



Na osnovu člana 24 Zakona o Tužilaštvu Brčko distrikta Bosne i Hercegovine („Službeni glasnik Brčko distrikta BiH“, broj 19/07), člana 10. stav (1) Pravilnika o vremenskim okvirima za postupanje po predmetima u sudovima i tužilaštvima u Bosni i Hercegovini („Službeni glasnik BiH“, broj: 5/13, 101/13 i 61/14), člana 3. stav (1) Uputstva o primjeni Pravilnika o vremenskim okvirima za postupanje po predmetima u sudovima i tužilaštvima u Bosni i Hercegovini („Službeni glasnik BiH“, broj: 5/13 i 101/13) i člana 13. i 14. Pravilnika o unutrašnjoj organizaciji i poslovanju Tužilaštva Brčko distrikta Bosne i Hercegovine - prečišćen tekst broj: A-310/2019 od 31.3.2022.godine, glavni tužilac Tužilaštva Brčko distrikta Bosne i Hercegovine, uz prethodno mišljenje Kolegija Tužilaštva dato na sjednici održanoj 9.2.2024. godine, d o n o s i

## **O D L U K U**

### **O UTVRĐIVANJU PREDVIDIVIH ROKOVA ZA RJEŠAVANJE PREDMETA U 2024. GODINI**

#### **GLAVA I - UVODNE NAPOMENE**

##### **Član 1 (Predmet)**

Odlukom o utvrđivanju predvidivih rokova za rješavanje predmeta u 2024. godini (u daljem tekstu: Odluka) utvrđuju se predvidivi rokovi za okončanje istraga (u daljem tekstu: predvidivi rokovi) u Tužilaštvu Brčko distrikta Bosne i Hercegovine (u daljem tekstu: Tužilaštvo) u periodu od 1.1 - 31.12.2024. godine.

##### **Član 2 (Cilj)**

Donošenje ove odluke ima za cilj osigurati primjerenu dužinu trajanja istraga, koja omogućava marljivo, efikasno i profesionalno postupanje u Tužilaštvu na načelima objektivnosti, nepristrasnosti, transparentnosti i jednakosti pristupa pravosuđu, kao osnovu prava na pravično suđenje.

#### **GLAVA II - IZRAČUNAVANJE I ISKAZIVANJE PREDVIDIVIH ROKOVA**

##### **Odjeljak I - Parametri za izračunavanje predvidivih rokova**

##### **Član 3 (Utvrđeni i određeni parametri)**

Za izračunavanje predvidivih rokova, u skladu sa članom 8. stav (3) Pravilnika o vremenskim okvirima za postupanje po predmetima u sudovima i tužilaštvima u BiH („Službeni glasnik BiH“, broj: 5/13 i 101/13) (u daljem tekstu: Pravilnik), upotrebljavaju se sljedeći parametri:

- a) optimalni rok utvrđen Pravilnikom i
- b) vrijeme potrebno za rješavanje zaostalih predmeta (u daljem tekstu: vrijeme za zaostale predmete).

##### **Član 4 (Optimalni rok)**

- (1) Optimalni rok je standardni vremenski okvir za zakonito i efikasno rješavanje predmeta i utvrđuje se Pravilnikom.
- (2) Ukoliko ovom odlukom za pojedine vrste predmeta nije utvrđen predvidivi rok takvi predmeti imaju se riješiti u optimalnom roku.

**Član 5**  
**(Vrijeme za zaostale predmete)**

Za izračunavanje vremena za zaostale predmete upotrebljavaju se sljedeći parametri:

- a) broj neriješenih predmeta određene vrste;
- b) broj tužilaca koji zadužuju istražne predmete određene vrste (u daljem tekstu: broj tužilaca) i
- c) godišnja orijentaciona norma.

**Član 6**  
**(Broj neriješenih predmeta)**

Za utvrđivanje broja neriješenih predmeta uzima se broj neriješenih predmeta po pravnom osnovu iskazan u Sistemu za automatsko upravljanje predmetima u tužilaštvima u Bosni i Hercegovini (u daljem tekstu: TCMS) na dan 6.2.2024. godine.

**Član 7**  
**(Broj tužilaca)**

- (1) Utvrđuje se da u vrijeme donošenja Odluke tužilačku funkciju u Tužilaštvu obnaša ukupno osam nosilaca tužilačkih funkcija i to:
  - a) glavni tužilac Tužilaštva (u daljem tekstu: glavni tužilac), koji ne zadužuje istražne predmete;
  - b) zamjenik glavnog tužioca Tužilaštva, koji zadužuje istražne predmete i
  - c) šest tužilaca Tužilaštva (u daljem tekstu: tužioci), koji zadužuju istražne predmete (jedna tužilačka pozicija upraž njena)
- (2) Utvrđuje se da su zamjenik glavnog tužioca i tužioci raspoređeni u niže organizacione jedinice Tužilaštva, tako da su u:
  - a) Odsjek za ratne zločine raspoređena dva tužioca;
  - b) Odsjek za opći kriminal raspoređena tri tužioca, od kojih jedan radi i na predmetima maloljetničkog kriminala (jedna tužilačka pozicija upražnjena);
  - c) Odsjek za organizirani kriminal, privredni kriminal i korupciju raspoređena dva nosioca tužilačkih funkcija: zamjenik glavnog tužioca i jedan tužilac.

**Član 8**  
**(Orijentaciona norma)**

- (1) Glavni tužilac nema obavezu zaduživanja i neposrednog rada na predmetima osim rješavanja prigovora, dok je zamjeniku glavnog tužioca određena orijentaciona norma u visini od 60 % norme tužioca.
- (2) Shodno utvrđenom obimu rada u smislu stava (1) ovog člana postupak izračunavanja predvidivih rokova vrši se u odnosu na ukupno 6,60 tužilaca.

**Odjeljak II - Formula za izračunavanje predvidivih rokova**

**Član 9**  
**(Formula za predvidivi rok)**

Predvidivi rok za rješavanje predmeta utvrđuje se po sljedećoj formuli:

$$\text{Predvidivi rok} = \text{Optimalni rok} + \text{Vrijeme za zaostale predmete}$$

**Član 10**  
**(Vrijeme za zaostale predmete)**

Vrijeme za zaostale predmete utvrđuje se po sljedećoj formuli:

$$\text{Vrijeme za zaostale predmete} = \frac{\text{Broj neriješenih predmeta određene vrste}}{\text{Broj tužilaca} \times \text{godišnja norma}} \times 365$$

**Odjeljak III - Iskazivanje predvidivih rokova**

**Član 11**  
**(Način iskazivanja)**

- (1) Predvidivi rokovi iskazuju se po glavama krivičnih zakona, kojim su propisana krivična djela iz nadležnosti Tužilaštva, i to:

- a) preuzetog Krivičnog zakona Socijalističke Federativne Republike Jugoslavije (za krivična djela protiv čovječnosti i vrijednosti zaštićenih međunarodnim pravom) i
- b) Krivičnog zakona Brčko distrikta Bosne i Hercegovine (za sva krivična djela).

(2) Predvidivi rokovi za predmete koji se odnose na krivična djela iz stava (1) ovog člana iskazuju se tebelarnim prikazom kreiranim u TCMS-u, koji je sastavni dio ove odluke.

### **Član 12 (Obavještenje o predvidivom roku)**

Obavještenje o predvidivom roku predat će se na zahtjev podnosiocu prijave/izvještaja ili oštećenom na obrascu za potvrdu prijema akata, po uspostavljanju odgovarajuće funkcionalnosti u TCMS-u.

## **GLAVA III - IZVRŠENJE, NADZOR I IZVJEŠTAVANJE**

### **Član 13 (Izvršenje Odluke)**

Za izvršenje ove odluke zadužuju se tužioci, koji će:

- a) korištenjem funkcionalnosti TCMS-a, kontinuirano povlačiti informacije o vremenu preostalom za rješavanje predmeta u predvidivom roku;
- b) povlačiti mjesečne statističke izvještaje o poštivanju predvidivih rokova i vršiti njihovu analizu;
- c) pojačati dinamiku rješavanja predmeta kod kojih je došlo do prekoračenja predvidivih rokova;
- d) dati prioritet u radu predmetima kod kojih je bliži istek predvidivog roka;
- e) preduzimati druge mjere iz svoje nadležnosti u pravcu izvršenja Odluke.

### **Član 14 (Nadzor)**

Nadzor nad izvršenjem ove odluke provodi glavni tužilac uvidom u evidencije o predmetima i preduzimanjem drugih mjera iz svoje nadležnosti.

### **Član 15 (Izvještavanje)**

- (1) Izvještaj o poštivanju optimalnih i predvidivih rokova sačinjava se u obliku polugodišnjeg i godišnjeg izvještaja korištenjem posebnog menadžerskog izvještaja u TCMS-u.
- (2) Izvještaji iz stava (1) ovog člana dostavljaju se Visokom sudskom i tužilačkom vijeću Bosne i Hercegovine (u daljem tekstu: Vijeće).
- (3) Polugodišnji izvještaj dostavlja se Vijeću do 31.07.2024.godine, a godišnji do 31.01.2025.godine.

## **GLAVA IV - ZAVRŠNE ODREDBE**

### **Član 16 (Stupanje na snagu)**

Ova odluka stupa na snagu danom donošenja.

### **Član 17 (Objava Odluke)**

Ova odluka objavljuje se na internetskoj stranici Tužilaštva.

Broj: A - 80 /2024  
Brčko, 9.2.2024. godine

**GLAVNI TUŽILAC**  
**ZEKERIJA MUJKANOVIĆ**

Dostavljeno:

- 1. Visokom sudskom i tužilačkom vijeću BiH 1 x;
- 2. Tužiocima 8x
- 3. a/a 1 x